

A serene sunset over a lake with mountains in the background and a few people on the water. The sun is low on the horizon, casting a golden glow across the sky and water. The mountains are silhouetted against the bright sky. The water is calm, reflecting the sun's light. A few small figures are visible on the water, possibly rowing or fishing. The overall mood is peaceful and contemplative.

# Die Viering van die Sabbat

Ellen White



# DIE VIERING VAN DIE SABBAT

**Vertaal vanuit: *Testimonies* Volume VI bls. 349-368.**

**Bron: [www.egw writings.org](http://www.egw writings.org)**

**Vanuit: Uittreksels uit die Getuienisskrifte: Hoofstuk 5**

## INHOUD

Die Viering van die Sabbat .....	2
Hervorming wat Betref Sabbatviering .....	5
Dink aan die Sabbat - Sabbatsvoorbereiding .....	6
Die Sabbat in die Huis.....	9
Onderwerpe vir Sabbatsgesprekke .....	10
Reise op die Sabbat .....	12
Sabbatbyeenkomste .....	13
Doel van die Sabbatdiens .....	14
Die Poort van die Hemel .....	15
Gods Goedheid die Oorsaak van Blydskap.....	16
Ons Lofliedere Word Aangevul Deur die Hemelse Koor .....	18
Dink Terug aan die Openbarings van God se Genade .....	19

## Die Viering van die Sabbat

**Daar is groot seëninge verbonde aan die viering van die Sabbat,** en God wil dat die Sabbat ‘n dag van vreugde vir ons sal wees. Daar was blydskap toe die Sabbat ingestel is. God het met voldoening neergekyk op Sy handewerk. Hy het alles wat Hy gemaak het “Baie goed” genoem. Gen. 1:31. Hemel en aarde het gejuig. “Toe die moresterre saam gejubel en al die seuns van God gejuig het.” Job 38:7. Alhoewel die sonde die wêreld binnegedring het om Sy volmaakte werk te bederf, **gee God nogtans aan ons die Sabbat as ‘n bewys dat die Almagtige God, oneindig in goedheid en genade, alle dinge geskape het. Ons hemelse Vader verlang om deur die viering van die Sabbat die kennis van God onder die mense te bewaar. Hy verlang dat die Sabbat ons harte tot Hom, as die ware en lewende God, sal trek, en dat ons deur Hom te ken, lewe en vrede mag hê.**

Toe God Sy volk Israel uit Egipte verlos het en aan hulle Sy wet gegee het, **het Hy hulle geleer dat hulle deur Sabbatviering van die afgodediens onderskei sal wees.** Dit is Sabbatviering wat die verskil aangetoon het tussen diegene wat die heerskappy van God erken het, en diegene wat geweier het om Hom aan te neem as hulle Skepper en Koning. “Tussen My en die kinders van Israel is dit vir ewig ‘n teken,” het die Here gesê. “En die kinders van Israel moet die Sabbat onderhou, deur die Sabbat te vier in hulle geslagte as ‘n ewige verbond.” Exod. 31:17, 16.

**Net soos die Sabbat gegee is as ‘n teken wat Israel onderskei het toe hulle uit Egipte gekom het om die aardse Kanaan binne te gaan, is dit vandag ook die teken wat Gods volk onderskei waar hulle uit die wêreld uitkom om die hemelse rus in te gaan.** Die Sabbat is ‘n teken van die verhouding tussen God en Sy volk—’n teken dat hulle Sy wet in ere hou. **Dit is die teken wat Gods lojale onderdane onderskei van die oortreders van Sy wet.**

Uit die wolkkolom het Christus aangaande die Sabbat verklaar, **“Julle moet sekerlik My Sabbatte onderhou, want dit is ‘n teken**

tussen My en julle in julle geslagte, sodat die mense kan weet dat Ek die Here is wat julle heilig.” Exod. 31:13. Die Sabbat wat aan die wêreld gegee is as teken dat God die Skepper is, is ook die teken dat Hy die Heiligmaker is. Die krag waardeur alle dinge geskape is, is ook die krag wat die siel weer herskep in Sy ewebeeld. Die Sabbat is die teken van heiligmaking aan diegene wat dit onderhou. Ware heiligmaking beteken eenheid met God, gelykheid aan Sy karakter. Dit word verkry deur gehoorsaamheid aan daardie beginsels wat ‘n afskrif is van Sy karakter. En die Sabbat is ook die teken van gehoorsaamheid. Hy wat van harte die vierde gebod gehoorsaam, sal ook die hele wet gehoorsaam. Hy word geheilig deur gehoorsaamheid.

Aan ons, sowel as aan Israel, is die Sabbat gegee as ‘n “Ewige verbond.” Aan diegene wat die Sabbat eerbiedig is dit gegee as ‘n teken dat God hulle erken as Sy uitverkore volk. Dit is ‘n pand dat Hy Sy verbond met hulle sal nakom. Elke siel wat die teken van Gods regering aanneem, plaas homself onder die ewige goddelike verbond. Hy verbind homself met die goue ketting van gehoorsaamheid, waarvan elke skakel ’n belofte is.

Die vierde gebod is die enigste een van die tien wat die seël van die Groot Wetgewer en Skepper van hemel en aarde bevat. Diegene wat hierdie gebod gehoorsaam, neem Sy naam aan, en al die seëninge wat daaraan verbode is, is hulle s’n. “En die Here het met Moses gespreek en gesê: Spreek met Aaron en sy seuns en sê: So moet julle die kinders van Israel seën deur vir hulle te sê:

Die Here sal jou seën en jou behoed;  
Die Here sal Sy aangesig oor jou laat skyn en jou genadig wees;  
Die Here sal Sy aangesig oor jou verhef en vir jou vrede gee.  
So moet hulle dan My Naam op die kinders van Israel lê;  
en Ek sal hulle seën.” Num. 6:22-27.

Deur Moses is ook die belofte gegee: “Die Here sal jou vir Hom as heilige volk bevestig soos Hy vir jou gesweer het, as jy die gebooië van die Here jou God hou en in Sy weë wandel. En al die volke van die aarde sal sien dat die Naam van die Here oor jou uitgeroep is. ... En die Here sal jou die kop en nie die stert maak nie, en jy sal net bo-op en nie onder wees nie as jy luister na die gebooië van die Here jou God wat ek jou vandag beveel om te hou en te doen.” Deut. 28:9-13.

Die Psalmis, onder invloed van die Heilige Gees, sê:

“Kom, laat ons jubel tot eer van die Here,  
laat ons juig ter ere van die Rots van ons heil! ...

Want die Here is ’n grote God,  
ja ’n groot Koning bo al die gode.

In wie se hand die diepste plekke van die aarde is,  
en die toppe van die berge is syne.

Aan wie die see behoort wat Hy self gemaak het,  
en die droë land wat Sy hande geformeer het.

Kom, laat ons aanbid en neerbuk;  
laat ons kniel voor die Here wat ons gemaak het.

Want Hy is onse God.”

“Hy het ons gemaak, en ons is Syne,  
Sy volk en die skape van Sy weiding.”

Ps. 95:1-7; Ps. 100:3.

Hierdie beloftes wat aan Israel gegee is geld ook vir Gods volk vandag. Dit is die boodskappe wat die Sabbat tot ons bring.

## **Hervorming wat Betref Sabbatviering**

**Die Sabbat is die goue band wat God en Sy volk verenig.** Maar die Sabbatgebod is verbreek. God se heilige dag is verontheilig. Die Sabbat is uit sy plek gestoot deur die mens van die sonde, en 'n gewone werksdag is in die plek daarvan verhef. Daar is 'n breuk in die wet gemaak, en hierdie breuk moet herstel word. Die ware Sabbat moet weer tot sy regmatige plek verhef word as Gods rusdag. In die agt-en-vyftigste hoofstuk van Jesaja word die werk wat Gods volk moet doen, beskryf. Hulle moet die wet grootmaak en dit vereer; die ou puinhope moet herbou word, en die fundamente van vorige geslachte weer opgerig word.

Aan diegene wat hierdie werk doen, sê God: “En jy sal genoem word: Bouer van gebreekte mure, hersteller van paaie, om bewoonbaar te maak. As jy jou voet terughou van die Sabbat — om nie jou besigheid op my heilige dag te doen nie, en as jy die Sabbat 'n verlusting noem en die heilige dag van die Here eerwaardig; en as jy dit eer deur nie jou gewone gang te gaan nie, nie geleentheid vir jou besigheid soek of ydele taal spreek nie; dan sal jy jou verlustig in die Here, en Ek sal jou laat ry oor die hoogtes van die aarde en jou laat geniet die erfdeel van jou vader Jakob; want die mond van die Here het dit gespreek.” Verse 12-14.

**Die Sabbatkwessie sal die geskilpunt wees in die laaste botsing waarin die hele wêreld sal betrokke wees.** Mense het die beginsels van Satan vereer bokant die prinsipes van die hemel. Hulle het die vals sabbat, wat Satan verhef het as die teken van sy gesag, aangeneem. Dog God het Sy seël gesit op Sy koninklike gebod. **Elkeen van hierdie sabbatsinstellings dra die naam van sy maker, 'n onuitwisbare merk wat die gesag van elke een aantoon. Dis ons werk om die wêreld hiervan te verwittig.** Ons moet hulle daarop wys dat dit die allergewigtigste gevolge sal hê of hulle die merkteken van God koninkryk dra, of die merkteken van die koninkryk van rebellie, want deur die merkteken wat hulle dra, toon hulle wie se onderdane hulle is. **God het ons geroep om die vaandel van Sy Sabbat, wat onder die**

**voete vertrap word, te verhoog. Hoe belangrik is dit dan nie dat ons voorbeeld ten opsigte van Sabbatviering die regte sal wees.**

By die stigting van nuwe kerke behoort predikante die lede sorgvuldig te onderrig in verband met behoorlike Sabbatviering. Ons moet oppas dat ons, wat voorgee om Gods heilige rusdag te vier, nie so laks word soos die Sondagvierders nie. Die skeidingslyn moet duidelik getrek wees tussen diegene wat die merkteken van Gods koninkryk dra, en diegene wat die merkteken van die koninkryk van die opstandelinge dra.

**Daar is ver meer eerbied aan die Sabbat verskuldig as wat deur baie sogenaamde Sabbatvierders daaraan betoon word.** Die Here word baie onteer deur diegene wat die Sabbat nie hou volgens die gebod in die letter en in die gees nie. Hy roep om 'n hervorming wat betref Sabbatviering.

## **Dink aan die Sabbat - Sabbatsvoorbereiding**

Reeds aan die begin van die vierde gebod sê die Here, “Gedenk die Sabbatdag.” Hy het gewet dat die mens, in die gedrang van die baie sorg en moeilikhede, geneig sou wees om homself te verskoon van die volle nakoming van die eise van die wet, en dat hy die heiligheid daarvan uit die oog sou verloor. Daarom het Hy gesê, “Gedenk die Sabbatdag, dat jy die heilig.” Exod. 20:8.

**Gedurende die hele week moet ons aan die Sabbat dink, en klaar maak om dit te vier volgens die gebod. Ons moenie die Sabbat as 'n blote wettiese verpligting beskou nie. Ons behoort die geestelike verband daarvan met al die besighede van die lewe te besef.** Almal wat die Sabbat beskou as 'n teken tussen hulle en God, en toon dat Hy die God is wat hulle heilig, sal die beginsels waarop Sy regering rus reg verteenwoordig. In hulle daaglikse lewe sal hulle die wette van Sy koninkryk uitleef. **Hulle sal daagliks bid dat die heiligmaking van die Sabbat op hulle mag rus. Hulle sal daagliks die gemeenskap van Christus geniet, en die volmaaktheid van Sy karakter tentoonstel. Elke dag sal hulle hulle lig voor ander laat skyn deur hulle goeie werke.**



In alles in verband met Gods werk moet die oorwinning eers in die huislike lewe behaal word. Hier moet die voorbereiding vir die Sabbat begin. Gedurende die week moet die ouers onthou dat die huis 'n skool is waarin die kinders voorberei word vir die hemel. Laat hulle regte woorde spreek. **Daar moet geen woorde gespreek word wat die kinders nie moet hoor nie. Pas op vir ongeduld.** Ouers, u moet gedurende die week lewe asof u in die teenwoordigheid van die heilige God is wat die kinders aan u toevertrou het om vir Hom op te lei. Lei die klein gemeentetjie in u huis vir Hom op, sodat almal op die Sabbatdag voorberei kan wees om in die huis van die Here te gaan aanbid. **Stel u kinders elke more en elke aand voor die aangesig van die Here as Sy deur-bloed-gekoopte erfdeel. Leer hulle dat dit hulle hoogste voorreg en plig is om die Here lief te hê en te dien.**

Ouers moet daarop gesteld wees om die godsdienste vir hulle kinders leersaam te maak. Gedeeltes uit die Skrif moet meer dikwels op hulle lippe wees, veral daardie gedeeltes wat die hart voorberei vir geestelike dienste. **Die kostelike woorde, “Wees net maar stil tot God, my siel, want van Hom is my verwagting!” (Ps. 62:6), behoort dikwels opgesê te word.**

As ons op hierdie wyse aan die Sabbat dink, sal die stoflike nie die geestelike verdring nie. Geen dienste wat op die ses werksdae val, sal dan laat staan word vir die Sabbatdag nie. **Gedurende die week sal ons liggaamskragte nie so uitgeput word dat ons op die dag waarop die Here gerus en Hom verkwik het, te afgemat sal wees om deel te neem aan Sy dienste nie.**

Hoewel ons gedurende die hele week moet voorberei vir die Sabbat, **is Vrydag veral die voorbereidingsdag.** By monde van Moses het die Here aan die kinders van Israel gesê: “More is die rusdag, 'n heilige Sabbat van die Here. Wat julle wil bak, bak dit; en wat julle wil kook, kook dit; en bêre vir julle alles wat oor is, om dit te bewaar tot die more toe.” “Die volk het rondgeloop en dit versamel en in handmeulens gemaal of in vysels gestamp, en hulle het dit in potte gekook en daarvan roosterkoeke gemaak.” Exod. 16:23; Num. 11:8. Daar was werk om te doen in verband met die voorbereiding van die brood wat uit die hemel

aan die kinders van Israel gestuur is. Die Here het hulle beveel dat hierdie werk op Vrydag, die voorbereidingsdag, gedoen moes word. Dit was 'n toets vir hulle. Die Here wou sien of hulle die Sabbat sou vier of nie.

Hierdie bevel van die lippe van Jehova geld ook vir ons vandag. Die Bybel is 'n volmaakte gids, en as die bladsye daarvan in gebed, deur gewillige harte ondersoek word, hoef niemand in verband met hierdie vraagstuk verkeerd te handel nie.

Daar is baie wat onderrig nodig het in verband met die kleredrag by die eredienste op die Sabbat. Hulle moet nie voor die aangesig van die Here verskyn in die alledaagse klere wat hulle gedurende die week dra nie. Almal behoort 'n spesiale Sabbatpak te hê om te dra wanneer hulle na Gods huis gaan vir die dienste. Hoewel ons nie die wêreldse modes moet naäap nie, moet ons nogtans nie onverskillig wees ten opsigte van ons uiterlike voorkomste nie. Ons moet netjies aangetrek wees, dog nie uitgedos nie. Die kinders van God moet van buite en binne rein wees.

Die voorbereiding vir die Sabbat moet op Vrydag klaar wees. Sien toe dat die klere alles in orde is en dat al die kokery klaar is. Die baddens moet geneem en die skoene skoongemaak word vóór die Sabbat aanbreek. Dit kan gedoen word. As u daarvan 'n reël maak, sal dit maklik gaan. **Die Sabbat moenie bestee word aan die heelmaak van klere, koskook, genotsug, of enige ander wêreldse werk nie.** Voordat die son ondergaan moet alle sekulêre werk gestaak word, en alle wêreldse leesstof weggebêre word. Ouers, u moet u werk en die doel daarvan aan u kinders verduidelik, en hulle toelaat om u behulpsaam te wees in u voorbereiding om die Sabbat te vier volgens die gebod.

**Ons moet baie gesteld wees op die begin en die einde van die Sabbat. Onthou dat elke oomblik heilige tyd is. Waar moontlik moet werkgewers hulle werknemers van Vrydag twaalfuur afgee.** Gee hulle tyd om klaar te maak, sodat hulle die Sabbat van die Here met 'n stille gemoed kan verwelkom. As u so handel sal u geen verlies lei nie, selfs ook nie in tydelike dinge nie.

**Daar is nog iets wat aandag behoort te geniet op die voorbereidingsdag. Op hierdie dag behoort alle geskille tussen**

**broeders, of dit nou onenigheid in die gesin of die kerk is, uit die weg geruim te word. Laat alle toorn, woede en boosheid uit die hart verban word. “Bely mekaar julle misdade en bid vir mekaar, sodat julle gesond kan word.” Jak. 5:16. Doen dit in alle nederigheid.**

Vóór die Sabbat begin, behoort die gedagtes sowel as die liggaam van wêreldse besigheid afgetrek te word. God het Sy Sabbat aan die einde van die ses werksdae gestel, sodat die mens tyd kan neem om te peins oor die vordering wat hy gedurende die week gemaak het ter voorbereiding vir die heilige koninkryk waar geen oortreder sal toegelaat word nie. Ons behoort elke Sabbat ons siele te ondersoek om te sien of die afgelope week aan ons geestelike wins of verlies besorg het.

**U ewige saligheid hang daarvan af of u die Sabbat aan die Here heilig of nie.** God sê, “Want die wat My eer, sal Ek eer.” 1 Sam. 2:30.

## **Die Sabbat in die Huis**

**Laat die lede van die gesin, voor die son ondergaan, saamkom om Gods Woord te lees, te sing en te bid.** In hierdie opsig is daar hervorming nodig, want baie het agtelosig geword. Ons behoort aan God belydenis te doen. Ons behoort van nuuts af te begin en spesiale voorsorg te maak sodat elke lid van die gesin voorberei kan wees om die dag wat God geseën en geheilig het te eerbiedig.

Moenie die kosbare ure van die Sabbat in die bed deurbring nie. Op Sabbatoggende behoort die lede van die gesin vroeg op te staan. As hulle laat opstaan, is daar altyd ‘n gejaag en verwarring om klaar te maak vir ontbyt en die Sabbatskool. **Almal is gewoonlik haastig en ongeduldig met die gevolg dat daar onheilige gevoelens in die huis ontstaan. Die Sabbat, op hierdie manier onheilig, word dan ‘n las, en in plaas dat daar in liefde uitgesien word na sy koms, word dit eerder gevrees.**

**Ons moet nie vir die Sabbat ‘n groter eetmaal, met ‘n groter verskeidenheid van kos klaarmaak as vir ander dae nie. In plaas daarvan behoort die kos eenvoudig te wees, en minder moet geëet word, sodat die verstand helder en lewendig kan wees om geestelike dinge te besef.** Om te ooreet benewel die brein. Die kosbaarste woorde

mag gehoor en nie gewaardeer word nie, omdat die verstand benewel is deur 'n verkeerde diëet. Deur hulle op die Sabbat te ooreet, is daar vele wat God meer ontet as wat hulle dink.

Hoewel kokery op die Sabbat vermy moet word, is dit nie nodig om koue kos te eet nie. As die weer koud is, kan die kos wat die vorige dag berei is, opgewarm word. Maak die maaltye, hoewel eenvoudig, smaaklik en aantreklik. **Maak iets wat as 'n lekkerny beskou sal word, iets wat die gesin nie elke dag kry nie.**

Laat die kinders deelneem aan die huisgodsdien. Laat almal hulle Bybels bring, en elkeen een of twee tekste lees. Sing daarna 'n welbekende lied en sluit af met gebed. In hierdie opsig het Christus ons 'n modelgebed gegee. Die "Onse Vader" is nie bedoel om as blote vorm opgesê te word nie, maar dis 'n voorbeeld van wat ons gebede behoort te wees — eenvoudig, ernstig, en veelomvattend. Maak u behoeftes aan die Here bekend deur 'n eenvoudige gebed, en betuig u dank vir Sy seëninge. Op hierdie manier nooi u Jesus om 'n welkome gas in u hart en huis te wees. **By die huisgodsdien is lang gebede in verband met dinge wat nie van onmiddellike belang is nie, onvanpas.** Hulle maak die uur van gebed vervelend waar dit as 'n voorreg en seën moet beskou word. Maak die tydjie van gebed belangwekkend en vreugdevol.

Die Sabbatskool en die diens neem nie die hele Sabbat in beslag nie. Die deel wat oorbly vir die gesin kan die beste en heiligste gemaak word van al die Sabbatsure. Die grootste gedeelte van hierdie tyd behoort die ouers met hulle kinders deur te bring. **In baie gesinne word die jonger kinders aan hulleself oorgelaat, om hulleself te vermaak so goed as hulle kan. As kinders alleen gelaat word, word hulle gou woelig, en begin hulle te speel, of vang die een of ander kattedekwaad aan. Op hierdie wyse deurgebring, het die Sabbat vir hulle geen heilige betekenis nie.**

### Onderwerpe vir Sabbatgesprekke

**As die weer mooi is, kan ouers hulle kinders uitneem in die lande en onder die bome. Daar te midde van die natuurskoon kan u hulle vertel van die doel van die Sabbatsinstelling.** Beskryf die groot

skeppingswerk van God vir hulle. Vertel hulle dat die aarde, toe dit van Gods hand gekom het, heilig en pragtig was. Elke blom, elke bossie, elke boom, het beantwoord aan die doel van die Skepper. Alles wat die oog aanskou het, was heerlik, en het die hart vervul met gedagtes van die liefde van God. Daar was geen enkele wanklank nie. Wys hulle daarop dat dit die sonde is wat Gods volmaakte skepping bederf het; dat dorings en distels, droefheid en pyn en die dood, alles die gevolg is van ongehoorsaamheid aan God. Wys hulle daarop hoedat die aarde, alhoewel deur die vloek van die sonde geskend, nog die goedheid van God openbaar. Die groen velde, hoë bome, die heerlike sonskyn, die wolke, die dou, die plegtige stilte van die nag, die heerlikheid van die sterrehemel, en die maan in sy skoonheid, alles getuig van die Skepper. Daar val geen druppel reent nie en geen ligstraal skyn op ons ondankbare aarde nie, of hulle getuig van die verdraagsaamheid en die liefde van God.

Vertel hulle van die weg van saligheid; hoedat God die wêreld so liefgehad het “dat Hy Sy eniggebore Seun gegee het, sodat elkeen wat in Hom glo, nie verlore mag gaan nie, maar die ewige lewe kan hê.” Joh. 3:16. Vertel die lieflike verhaal van Bethlehem. Stel Jesus aan u kinders voor, as ‘n kind wat gehoorsaam was aan Sy ouers, as ‘n vlytige jong man wat gehelp het om die familie te onderhou. Op hierdie manier kan u aan hulle verstand bring dat die Heiland die beproewings, benoudhede, versoekings, hoop en vreugde van die jongmense ken, en dat Hy hulle sal help en met hulle medelye sal hê. Lees saam met hulle van tyd tot tyd die interessante verhale van die Bybel. Stel vrae omtrent wat hulle in die Sabbatskool geleer het, en leer saam met hulle die les vir aanstaande week.

As die son ondergaan moet die heilige ure afgesluit word met ‘n lied en gebed; waarin die Here uitgenooi word om met u te wees in die werksaamhede van die volgende week.

Sodoende kan ouers die Sabbat die beste dag van die week maak — soos dit ook behoort te wees. Hulle kan hulle kinders lei om dit as ‘n verlusting te beskou, die dag van alle dae, die heilige van die Here eerwaardig.

Ek beveel u, my broeders en susters, “Gedenk die Sabbatdag, dat jy dit heilig.” As u verlang dat u kinders die Sabbat sal vier volgens die gebod, moet u hulle deur voorbeeld en gebod leer. Waarhede wat diep in die hart ingeskryf word, kan nooit heeltemal uitgewis word nie. Dit mag versteek raak, maar kan nooit uitgedelg word nie. Die indrukke wat in die eerste lewensjare gemaak word, sal op latere leeftyd vrugte afwerp. Daar mag omstandighede ontstaan wat kinders van hulle ouers en die ouerhuis skei, maar so lank as hulle leef sal die onderrig wat in hulle kinder- en jongelingsjare gegee is, vir hulle ‘n seën wees.

## **Reise op die Sabbat**

As ons die seën wat beloop is aan diegene wat gehoorsaam is, verlang, moet ons die Sabbat met groter noulettendheid vier. Ek is bevrees dat ons baie keer op hierdie dag reis, waar ons dit kon vermy het. Ooreenkomstig die lig wat die Here gegee het ten opsigte van die viering van die Sabbat, behoort ons versigtiger te wees wat betref boot- en motorreise op hierdie dag. In verband hiermee behoort ons die regte voorbeeld te stel aan ons kinders en jongmense. Ten einde die kerke wat ons hulp nodig het te bereik om aan hulle die boodskap te bring wat God verlang dat hulle sal hoor, mag dit vir ons nodig wees om op die Sabbat te reis; dog ons moet sover moontlik probeer om ons reiskaartjies uit te neem en die nodige reëlins op ‘n ander dag te tref. As ons ‘n reis begin moet ons alles in ons vermoë doen om nie ons bestemming op die Sabbat te bereik nie.

Wanneer ons verplig is om op die Sabbat te reis, moet ons probeer om die geselskap te vermy van diegene wat oor wêreldse dinge gesels. Ons moet ons gedagtes op die Here vestig, en met Hom gemeenskap beoefen. Wanneer die geleentheid hom aanbied, moet ons met ander oor die waarheid praat. Ons moet gedurig bereid wees om lyding te verlig, en diegene wat in nood verkeer, te help. In sulke gevalle verlang God dat ons die wysheid en kennis wat Hy aan ons gegee het, sal gebruik. Maar ons moenie besigheidsake bespreek nie, of gewone wêreldse gesprekke voer nie. Ten alle tye en op alle plekke, verlang God dat ons ons getrouheid aan Hom sal toon deur ons eerbied vir die Sabbat.

## Sabbatbyeenkomste

Christus het gesê, “Waar twee of drie vergader in My Naam, daar is Ek onder hulle.” Matt. 18:20. **Waar gelowiges is, al is dit maar twee of drie, moet hulle op die Sabbat bymekaar kom en vir hulle die belofte van die Here toeëien.**

Die klein groepies wat saamkom om die Here te dien op Sy heilige dag, het die reg om aanspraak te maak op die seën van Jehova. Hulle behoort te glo dat die Here Jesus ‘n geëerde gas onder hulle is. Elke ware gelowige wat die Sabbat hou moet die belofte van God toeëien, “Sodat die mense kan weet dat Ek die Here is wat julle heilig.” Exod. 31:13.

**Die preekdiens by ons Sabbatbyeenkomste moet oor die algemeen kort wees. Daar moet geleentheid verskaf word aan diegene wat die Here liefhet om uiting te gee aan hulle dankbaarheid en liefde.**

Waar ‘n kerk sonder ‘n predikant is, moet iemand aangestel word as leier. Dog dit is nie nodig vir hom om ‘n preek te lewer nie of ‘n groot gedeelte van die tyd in beslag te neem nie. ‘n Kort, interessante Bybelstudie sal dikwels van groter waarde wees as ‘n preek. En dit kan dan opgevolg word deur ‘n biduur en getuienisdien.

**Diegene wat as leiers optree in die kerk moet hulle liggaamlike en verstandelike kragte gedurende die week nie uitput sodat hulle op die Sabbat nie in staat is om die verkwikkende invloed van die Evangelie van Christus in die diens te laat geld nie. Doen minder gewone alledaagse werk, maar moenie die Here beroof deur aan Hom, op die Sabbat, diens te bring wat Hy nie kan aanneem nie. U moet nie wees soos mense wat geen geestelike lewe het nie. Die mense het u hulp op die Sabbat nodig. Verskaf aan hulle voedsel uit die Woord. Bring u beste gawe aan die Here op Sy Heilige dag. Gee aan Hom die kostelike kragte van die siel in toegewyde diens. Laat niemand na die diens kom om te slaap nie.**

**Daar behoort geen slapery te wees in Gods huis nie. U raak nie aan die slaap as u in u eie werk besig is nie, omdat u daarin**

**belangstel.** Sal ons toelaat dat die werk waarvan ons ewige heil afhang op 'n laer peil staan as die gewone sake van die lewe?

As ons gedurende die diens slaap, mis ons die seën wat die Here vir ons bedoel het. Die Sabbat moet nie 'n dag van ledigheid wees nie. Tuis, sowel as in die kerk, moet daar 'n dienswaardige gees geopenbaar word. Hy wat ons ses dae gegee het vir ons eie werk het die sewende dag geheilig en dit afgesonder vir Homself. Op hierdie dag sal Hy almal wat hulleself toewy aan Sy diens, op 'n spesiale wyse seën.

**Die ganse hemel vier die Sabbat, maar nie op 'n ledige, lustelose wyse nie. Op hierdie dag moet die hele siel wakker wees;** want is dit nie die dag waarop ons met God en Christus onse Heiland ontmoet nie? Ons mag Hom deur geloof aanskou. Hy verlang om elke siel te seën en te verkwik.

### **Doel van die Sabbatdiens**

Elkeen behoort te voel dat hy 'n deel daarin het om die Sabbatdienste interessant te maak. Ons moenie slegs uit blote vorm bymekaarkom nie, maar om gedagtes te wissel, om van ons daaglikse ondervindings mee te deel, om ons dank te betuig, om ons opregte begeerte vir goddelike verligting uit te spreek, sodat ons God kan ken, en Jesus Christus wat Hy gestuur het. As ons met mekaar van Christus praat sal ons ons siele versterk vir die stryd en beproewings van die lewe. Moenie dink dat julle Christene kan wees en julleself nogtans in julle eie dop kan terugtrek nie. Elke een van ons maak 'n deel uit van die mensdom as geheel, en ons ervarings oefen 'n wedersydse invloed uit.

Ons ontvang op verre na nie die seën wat ons behoort te ontvang by ons byeenkomste nie. Ons waarnemingsvermoë het verskerping nodig. Gemeenskapsoefening met mekaar behoort ons bly te maak. Met so'n hoop as wat ons het, behoort ons harte te gloei van die liefde van God.

Op elke godsdienstige byeenkoms waar ons teenwoordig is, behoort ons diep onder die indruk te verkeer dat God en Sy engele daar aanwesig is en saamwerk met alle opregte aanbidders. Wanneer u die plek van aanbidding binnegaan, vra die Here om alle boosheid uit u hart weg te



neem. **Bring na Sy huis niks wat Hy nie kan seën nie. Kniel neer voor God in Sy tempel en wy Sy eiendom aan Hom toe — wat Hy met die dierbare bloed van Christus gekoop het. Bid vir die spreker of leier van die vergadering. Bid dat daar grote seën mag kom deur die een wat die Woord van die lewe sal bedien. Probeer in alle erns om self ook ‘n seën te ontvang.**

God sal almal seën wat hulleself op hierdie wyse voorberei vir Sy diens. Hulle sal besef wat dit beteken om die versekering van die Gees te hê omdat hulle Christus deur geloof ontvang het.

### **Die Poort van die Hemel**

Die plek van aanbidding mag maar baie eenvoudig wees, dog dit sal nietemin deur God erken word. Vir diegene wat God in die gees en in waarheid en in heilige gewaad aanbid, sal dit soos die poort van die hemel wees. Die groep aanbidders mag maar klein wees, maar in die oog van die Here is hulle baie kosbaar. Deur die koevoet van waarheid is hulle soos onafgewerkte klippe uit die steengroef van die wêreld gebreek en in die werkwinkel van God gebring om reg gekap te word. Maar selfs in die onafgewerkte staat is hulle dierbaar in Gods oë. Die byl, die hamer, en die beitel van beproewing is in die hande van Een wat bedrewe is; en hulle word gebruik, nie om te vernietig nie, maar om die volmaaktheid van elke siel te volbring. Soos kostelike stene wat uitgebeitel is na die boustyl van ‘n paleis, is dit die doel van God dat ons ‘n plek sal vul in die hemelse tempel.

Die beskikkings en gawes van God ten behoeve van ons is sonder perk. Die troon van genade is op sigself die hoogste aantrekkingskrag, omdat die Een wat ons toelaat om Hom Vader te noem daarop sit. Maar God het die verlossingsplan nie as volledig beskou terwyl dit maar net Sy eie liefde geopenbaar het nie. Hy het dit so gereël dat Hy by Sy altaar ‘n Advokaat geplaas het, wat met ons natuur bekleed is. As ons Voorbidder, is dit Sy werk om ons aan God voor te stel as Sy seuns en dogters. Christus tree op ten behoeve van diegene wat Hom aangeneem het. Aan hulle gee Hy, kragtens Sy eie verdienste, mag om lede van die koninklike gesin te word, kinders van die hemelse Koning. **En die Vader**

**toon Sy oneindige liefde vir Christus, wat ons met Sy eie bloed losgekoop het, deur Christus se vriende te ontvang en te verwelkom as Sy eie vriende. Hy is tevrede met die versoening wat gemaak is. Hy is verheerlik deur die vleeswording, die lewe, dood, en middelaarskap van Sy Seun.**

Sodra die kind van God die genadetroon nader, word hy ‘n kliënt van die groot Advokaat. By die eerste uiting van berou en smeking om vergifnis, neem Christus sy saak op en maak dit Sy eie en lê die versoek voor Sy Vader asof dit Sy eie is.

Namate Christus in ons belang optree, maak die Vader die skatte van Sy genade vir ons oop, sodat ons dit kan geniet en dit ook aan ander kan meedeel. “Vra in My Naam,” sê Christus. “Ek sê nie vir julle dat Ek die Vader aangaande julle sal vra nie; want die Vader self het julle lief, omdat julle My liefgehad het. Maak gebruik van My naam. Dit sal verdienste aan u gebede gee en die Vader sal aan julle die rykdom van Sy genade skenk; daarom, ‘Bid en julle sal ontvang, sodat julle blydschap volkome kan wees.’ ” Joh. 16:24.

### **Gods Goedheid die Oorsaak van Blydschap**

God verlang dat Sy gehoorsame kinders tot Hom sal kom, Sy seën sal toeëien, en voor Hom sal kom met lof en danksegging. **God is die Bron van lewe en krag. Hy kan die woestyn in ‘n vrugbare land omskep vir die volk wat Sy gebooe bewaar; want dit strek tot heerlikheid van Sy naam.** Hy het dinge vir Sy uitverkore volk gedoen wat elke hart behoort aan te vuur tot danksegging, en dit grief Hom dat daar so min danksegging is. Hy verwag dat Sy volk op ‘n kragtiger wyse sal toon dat hulle stof tot dankbaarheid het, en ook sal wys dat hulle Sy goedheid besef.

**Die dinge wat God vir Sy volk doen moet dikwels vertel word.** Hoe dikwels het God nie in Sy handelinge met Israel van ouds mylpale langs die weg opgestel nie. In geval hulle die geskiedenis van die verlede miskien sou vergeet, het Hy aan Moses bevel gegee om die gebeurtenisse in die vorm van liedere op te stel, dat ouers dit aan hulle kinders kon leer. Hulle moes gedenktekens oprig sodat almal dit kon sien. **Hulle moes**

**spesiale moeite doen om die dinge te bewaar sodat hulle die geskiedenis kon vertel in geval die kinders in verband daarmee vrae stel.** Op hierdie wyse is die wonderlike handeling en die opvallende goedheid en genade van God in Sy sorg en uitredding van Sy volk, in die geheue bewaar.

Die vermaning word aan ons gerig, “Maar onthou die vorige dae waarin julle, toe julle verlig geword het, ‘n groot lydensworsteling deurstaan het.” Heb. 10:32. God het vir Sy volk van hierdie geslag opgetree as ‘n wonderwerkende God. Die geskiedenis van die verlede in verband met die saak van God, behoort dikwels onder die aandag van die volk, jonk en oud, gebring te word. Ons behoort dikwels die seëninge van God te tel, en Hom te loof vir Sy wonders.

**Hoewel ons vermaan word om nie ons onderlinge byeenkomste te versak nie, moet hierdie byeenkomste nie net dien vir ons eie verkwikking nie. Ons moet met groter ywer besiel wees om die vertroosting wat ons ontvang het, mee te deel. Dis ons plig om baie ywerig te wees vir die heerlikheid van God en om nie deur ‘n bedroefde gelaat of onverskillige woorde die indruk te gee dat die vereistes van God ons vryheid beperk nie.** Selfs in hierdie wêreld van droefheid, teleurstelling en sonde, verwag die Here dat ons opgeruimd en sterk sal wees in Sy krag. Die totale persoon is bevoorreg om in elke opsig ‘n besliste getuienis te lewer. Deur ons gelaatstrekke, ons beheersdheid, ons woorde, en ons karakter, moet ons getuig dat dit goed is om God te dien. Op hierdie wyse verkondig ons dat, “Die wet van die Here . . . volmaak [is en die siel] verkwik.” Ps. 19:8.

Die opgeruimde kant van die godsdiens sal deur almal wat daaglik aan God toegewy is, geopenbaar word. **Ons moet God nie ontter deur op ‘n bedroefde wyse van ons beproewings te praat nie. Alle beproewings wat ons aanneem as leermeesters sal vreugde bring.** Die hele Christelike lewe sal opheffend, verheffend, veredelend, en geurig wees as gevolg van goeie woorde en werke. **Die vyand skep daar behae in as siele neerslagtig, terneergedruk, treurend en kermend is;** hy wil juis hê dat ons sulke indrukke van die Christelike godsdiens moet verwek.

God wil nie hê dat ons treurig moet wees nie. Hy verlang dat elke siel sal seëvier deur die bewarende krag van die Verlosser. Die Psalmis sê: “Gee aan die Here, o seuns van God, gee aan die Here eer en sterkte! Gee aan die Here die eer van Sy Naam; aanbid die Here in heilige sieraad!” “Ek sal U verhoog, Here, want U het my gered en my vyande oor my nie laat bly wees nie. Here, my God, ek het U aangeroop om hulp, en U het my gesond gemaak. . . . Psalmis sing tot eer van die Here, o sy gunsgenote, en loof Sy heilige gedenknaam.” Ps. 29:1, 2; Ps. 30:2-5.

### **Ons Lofliedere Word Aangevul Deur die Hemelse Koor**

**Die kerk van God hier benede is een met die kerk van God daarbo. Gelowiges hier op aarde, en die wesens in die hemel wat nooit gesondig het nie, maak één kerk uit. Elke hemelse wese stel belang in die samekomste van die heiliges op die aarde om God te aanbid. In die binneste voorhof van die hemel luister hulle na die getuienisse vir Christus in die buitenste voorhof — die aarde, en die lof en danksegging van die aanbidders hier benede word opgeneem in die hemelse lied, en lof en blydschap weerklink deur die hemelse howe omdat Christus nie tevergeefs gesterf het vir die gevalle seuns van Adam nie. Terwyl die engele uit die bron self drink, drink die heiliges van die aarde van die heldere strome wat van die troon vloei, die strome wat die Godstad blymaak.**

**O, dat almal mag besef hoe naby die hemel aan die aarde is! Onbewus daarvan het die aardbewoners engele van die lig as metgeselle. ‘n Engel beskerm elke siel wat leef, soekende om daardie siel tot Christus te lei. Solank as daar hoop is — selfs totdat mense die Heilige Gees tot hulle ewige verderf weerstaan, word hulle beskerm deur hemelse wesens. Laat ons dit almal onthou, dat daar by elke byeenkoms van die heiliges hier benede, engele van God is wat luister na die getuienisse, liedere, en gebede. Laat ons onthou dat ons lofliedere aangevul word deur die kore van engelskare daarbo.**

Waar u dan van Sabbat tot Sabbat bymekaarkom, sing lofliedere aan Hom wat u uit die duisternis geroep het tot Sy wonderbare lig. Laat die aanbidding van die hart uitgaan tot Hom wat ons liefgehad het, en ons

van ons sondes gewas het in Sy bloed. Laat die liefde van Christus die hoofonderwerp wees van die prediker. Laat dit uitkom in eenvoudige taal in elke loflied. Laat die Gees van God die woorde van u gebede in u mond lê. Waar die Woord van die lewe verkondig word, laat u hartlike beaming daarvan getuig dat u dit aanneem as 'n boodskap uit die hemel. Ek weet dat dit baie ouderwets sal klink, maar dit sal 'n dankoffer aan God wees vir die brood van die lewe wat aan 'n hongerige siel gegee is. Hierdie reaksie op die inspirasie van die Heilige Gees sal sterkte aan u eie siel bring en 'n aanmoediging vir ander wees. Dit sal ten minste getuig dat daar in Gods gebou lewende stene is wat hulle lig laat skyn.

### **Dink Terug aan die Openbarings van God se Genade**

**Terwyl ons, nie die donker hoofstukke in ons lewe nie, maar die openbaring van die groot genade en bestendige liefde van God bepeins, sal ons veel meer lof laat hoor as klaagliedere. Ons sal praat van die getrouheid van God, die ware, tere, ontfermende herder van Sy kudde, waarvan Hy verklaar dat niemand hulle uit Sy hand sal ruk nie. Die taal van die hart sal nie uit selfsugtige klaagliedere en verkniesing bestaan nie. Lofbetuigings, soos helder vloeiende strome, sal van die ware gelowiges van God kom.** “Net goedheid en guns sal my volg al die dae van my lewe; en ek sal in die huis van die Here bly in lengte van dae.” “U sal my lei deur U raad en my daarna in heerlikheid opneem. Wie het ek buiten U in die hemel? Buiten U begeer ek ook niks op die aarde nie.” Ps. 26:6; Ps. 73:24, 25.

Waarom laat ons nie die geklank van ons geestelike liedere hoor op ons pelgrimsreis nie? Waarom keer ons nie terug tot die vorige eenvoud en ywer nie? Die rede waarom ons nie groter blydschap betoon nie, is omdat ons ons eerste liefde verloor het. Laat ons dan ywerig wees en ons bekeer, sodat ons kandelaar nie uit sy plek verwyder sal word nie. Die tempel van God in die hemel is geopen, en oor die drumpel daarvan skyn die heerlikheid vir elke gemeente wat God liefhet en Sy gebooie bewaar. Ons moet ondersoek, peins, en bid; dan sal ons geestelike insig ontvang om in die binneste voorhof van die hemelse tempel te sien. Ons sal die liedere en dankseggings van die hemelse koor rondom die troon hoor. Wanneer Sion ontwaak en sy lig laat skyn, sal sy lig baie deurdringend

wees, en daar sal heerlike lofliedere en dankseggings gehoor word in die samekomste van die heiliges. Geklaag en murmurings oor nietige teleurstellings en moeilikhede, sal ophou. Namate ons die goue oogsalf aansmeer, sal ons die heerlikhede van die lewe hierna sien. Ons geloof sal die duistere skaduwee van Satan deurdring en ons sal sien hoedat ons Advokaat die wierook van Sy eie verdienste in onse belange offer. Wanneer ons dit sien soos die Here wil hê dat ons dit moet sien, sal ons 'n besef kry van die grootheid en veelsydigheid van die liefde van God.

Die Here leer ons dat ons in Sy huis moet vergader om die hoedanighede van Sy volmaakte liefde aan te kweek. Dit sal die aardbewoners geskik maak vir die wonings wat Christus gaan berei het vir diegene wat Hom liefhet. Daar sal hulle elke week op die sabbat en elke maan op die nuwemaan vergader in die heiligdom, om te verenig in die wonderlikste liedere, in dankbaarheid en tot eer van Hom wat op die troon sit, en aan die Lam, tot in alle ewigheid.



# Die Viering van die Sabbat

Uit die wolkkolom het Christus aangaande die Sabbat verklaar, “**Julle moet sekerlik My Sabbatte onderhou, want dit is ’n teken tussen My en julle in julle geslagte, sodat die mense kan weet dat Ek die Here is wat julle heilig.**” Exod. 31:13. **Die Sabbat wat aan die wêreld gegee is as teken dat God die Skepper is, is ook die teken dat Hy die Heiligmaker is.** Die krag waardeur alle dinge geskape is, is ook die krag wat die siel weer herskep in Sy ewebeeld. **Die Sabbat is die teken van heiligmaking aan diegene wat dit onderhou.** Ware heiligmaking beteken eenheid met God, gelykheid aan Sy karakter. Dit word verkry deur gehoorsaamheid aan daardie beginsels wat ’n afskrif is van Sy karakter.

Aan ons, sowel as aan Israel, is die Sabbat gegee as ’n “Ewige verbond.” Aan diegene wat die Sabbat eerbiedig is dit gegee as ’n teken dat God hulle erken as Sy uitverkore volk. Dit is ’n pand dat Hy Sy verbond met hulle sal nakom. Elke siel wat die teken van Gods regering aanneem, plaas homself onder die ewige goddelike verbond. Hy verbind homself met die goue ketting van gehoorsaamheid, waarvan elke skakel ’n belofte is.